

茶院府君傳

府君名舜臣唐殿中丞後與

英侯王仙芝黃巢之亂杖策廣明間以

實府君承弼之功故亭英侯誥詞有云難兄難弟奮庸

熙載同德同力竭忠効謀又云故今南土之安藉爾兄

弟之力府君義烈可觀已陶雅爲歙州刺史初克婺州

天祐中府君以雅之命主婺輸賦總卒三千戍之邑賴

以安因焉是爲婺之始祖貲業鉅富仕至制置茶院

夫人杜氏生三子仕南唐補承旨常侍卒葬萬安鄉千

秋里地名連同



歙溪府君傳

府君諱惟甫字全美茶院府君曾孫少儻事繼母甚  
謹嘗從兄學詩得其要卓然名家有從兄少孤力學咸  
平中以鄉薦試南宮不利還家隱於卜肆不求聞老死  
無嗣府君爲治後事大中祥符甲寅官贊杜公爲婺漕  
使使居吏籍二十年明于法律而鄉里無怨景祐甲戌  
辭吏事歸治生業雖煩劇中賦詩自如也生太平興國  
已卯十月三十日辰時卒至和甲午二月九日享年七  
十有六葬十五都小港三公塢丙向配程氏葬二十七  
都官坑嶺丁向金斗形生子女各三人







海鹽遷祖五世列傳

孫瓊述

祖十四主簿諱順原名禧一字天吉別號勉軒世爲徽之婺源人府君姿甚聰明貌亦岐嶷讀書循禮處鄉黨怡怡愉愉人咸以君子目之元元貞間由上舍生尋擢海鹽幕官廉能簡要動必以禮言必以法不肖憚服之百姓富庶頌德者載道不幸於大德丁酉十二月二日卒於其邑生於宋理宗丙申春春秋六十有二原譜五十一有六誤娶姜氏生子一曰銘五七學諭是也奉柩窆於邑之澉浦陳灣山之陰

祀五七學諭諱銘字維新別號坦菴父十四主簿母姜

氏府君自父來仕海鹽不幸而卒于官年甫弱冠奉柩  
葬于澉浦陳灣山哀毀踰禮廬墓以居栖栖然不忍去  
遂家邑之東門聞琴坊以占籍焉府君刻意問學凡經  
書子史無不講貫人苟有所質若裂帛破竹錙錙畫畫  
必濬拔其本源而後已至大四年領鄉薦爲潮陽學諭  
詞藻煥發英才而騰起者非一人皆府君教育之所致  
也厥後九載考滿尋擢知廬陵縣事以老辭歸隱林下  
扁其所居之堂曰文會左圖右史日與高人韻士講學  
其間以終天年娶胡氏生子二曰君顯懋卿卒二六歷  
元年十一月二日春秋六十有四後三年四月六日附

葬於澉浦陳灣山父塋之側

按天歷以戊辰改元逆數  
公年六十有四當生于宋

咸淳元年乙丑

祖郴州學正諱懋卿字勉之別號悅山祖十四主簿父  
銘歷歷皆有顯名母胡氏府君生有志操氣量宏大質  
而禮簡而文彬彬乎古之君子由臺試備榜爲郴州學  
正未二載而文教之施若霖雨大降枯槁被之者勃然  
興起有不期然而然者不久以疾歸林下書卷不釋手  
蓋耽嗜之深不能自己鄉黨有是非曲直必正言以抗  
之不如柔不吐剛雖親友不避人咸以直稱之卒于至  
正四年甲申娶袁氏

一本作袁氏

賢明有淑德生子一曰光



祖春秋六十有三以是年八月二十一日附葬陳灣山

祖塋之次

以至正四年甲申逆數公年六十有三當生于前至元十九年壬午

四世半軒府君諱光祖字勝宗號半軒曾祖十四主簿  
祖銘父懋卿母袁氏府君生于順帝後至元二年丙子  
謹厚慎重不藉聲利無毀譽于人喜與侷儻士大夫交  
襟度灑落丰姿瑰瑋人器重之見有怠傲廢事者心憾  
憾不樂嘗自言曰使吾子孫親賢友善以成其德吾死  
無憾矣是以子孫益加勉勵無踰矩度焉卒于洪武甲  
戌九月二日春秋五十有九娶李氏生子三長曰貞貞  
後二年丙子葬于甘泉鄉之原

五世松居府君諱原貞字養正別號松居曾祖銘大父懋卿父光祖母李氏府君氣宇不凡德性堅定有高人藐士之志雖或見憎於庸人俗子亦不少靡非氣之充者不能也未嘗浪出厭市繁華乃課子孫以耕讀爲太平之民竟以是而卒娶錢氏生子二曰瓊曰瑛卒于正統五年庚申七月廿七日寅時春秋七十有六後二年十月初九日窆于甘泉鄉父塋之側

以正統五年庚申逆數公年七十有

六當生於元至正二十五年乙巳

勅授文林郎監察御史謝文昌填諱





閔耕朱君傳

處士朱君諱瓊字欽禮閔耕其號也自高高祖來上海  
鹽歷教諭學正儒官三世至祖半軒始居尙胥里父松  
居母錢氏起家孝友尙醇樸處士自幼天資穎異體貌  
修偉長眷廣穎美髯宏聲有國士之風遇事果敢英敏  
不屑屑於拘謹少壯名傾鄉邑與邑大夫交常相得當  
世名公鉅卿握手言歡者非一人因是歷困阨不少挫  
晚置家業營邱墓圖族譜教子孫務耕讀以詩禮傳家  
生洪武甲子卒天順丁丑春秋七十有四葬甘泉鄉祖  
塋之次

先民集評 卷之三 六  
謝御史曰從來起家之英必有其豐功茂績爲一世不可少之人吾觀閱耕朱君之爲人其度量器宇實足以當公輔之任乃不竟其用僅于宗黨間植綱陳紀以開拓其家聲精神之所注抑何其廣大也多其風亦偉矣哉

附 怡白隱士欽禮朱公壽容讚

寬然其襟坦然其心聲華日盛歷練年深展武名家崇文尊德海湧福源山增壽域 謝文昌題

先伯祖養心公傳

憶泰禎之釋褐而起也先世淵源得之過庭者多所聞伯仲父葵愚公輩再世媿懿尤未易殫述云先是葵愚公舉於鄉公父養心伯祖又將二十年所得上壽考以歿時僅權厝豐山之原耳卯辰之役余承乏漳南伯父先以拜湘中令擢河東守翛然解組歸矣歸而更塋尊人于舊址之陽而貞珉之勒重而有待也又數年而泰禎荷蒙新皇簡擢爲耳目臣頃復受命按滇南過里門伯父則持封翁狀授泰禎父以傳請父命泰禎曰汝髫年逮事封翁蚤承識賞作傳當屬爾小子泰禎拜受而



思之傳者傳信也亦傳神也假令以卮詞溢美神弗肖  
語弗信也曷以傳爲古今豔稱不朽者三而富與貴無  
聞焉封翁非不安享世華獨其德沁人心功留人世言  
溢人耳生榮死哀有架久而不可磨滅者又何能贊一  
辭無已則據狀而叅之家大人居恒語次而爲之傳曰  
浙以西世族纍纍而吾尙胥里朱氏謬以門閥推溯其  
脉自茶院瓌公始源深流長則子子孫孫固應與六經  
並永也卜居胥里者肇于勉軒公不數傳而繁枝密葉  
代有顯人析之載析而胥里幾及境內外矣丰神豪爽  
步武勉軒公者曰可三公翁爲公仲子生而頗有瑞相

有瑞徵遂名符以期信字養心號者皆元應其瑞之意  
云兒時卽能辨李與群稚嬉有禮容俄遭考變徒跣深  
墨悲呼阿姆及藐諸孤仰天自矢曰值家不辰須早自  
奮爲世上奇男子以不隳其家聲聞者咸券賞之族有  
仲大母者一見喜曰是不凡子真吾後鳴之有司曰吾  
兒蚤世而乏遺孤願聽吾立愛乎非之子不足付吾資  
翁甫十五亦鳴有司以非序歸後訟繼者抵于辜翁獨  
超然免於評論非道不處以保其身覘蚤慧矣自是游  
心經史矻矻問帷中業謂青紫可芥拾也而太夫人陳  
氏方年高色養是亟遂誦鉛槧督耕桑以供滌瀝事時



與賀太孺人溫語婉容導慈顏之權而逾永其愛日析  
箸議起慨然曰先遺能幾丈夫俠骨萬鍾直一簞耳安  
問家人生產伯兄爲政平秩唯命卽旣售復易亦唯命  
上有三姊業字去有中窘者早寡者踰歲而一面者高  
堂不語而攢于眉太孺人力贊翁攜其夫婦母子以歸  
終其身饗殮是給而殮葬如禮隨時迂歸寧者至浹旬  
勿遣以適其子女之樂夫孝與恭天性也而習剝其樸  
問人倫之至者誰叔世而盡翁若也太史氏采而列諸  
孝義傳以風天下所裨益國家元氣可勝道哉爾時翁  
尙未嗣嘗詫起曰天阨我寧至阨我之子若孫積善餘



慶古人豈欺我陰行其德矢益堅蓋不數年卽舉二姑  
又篤生今兩伯云兩伯冲齡卽穎慧英英不凡識者已  
知其露頭角矣翁時時勉誨之曰吾幼年失怙壯歲食  
貧故落魄風塵猶然不羨富宗不較薄產一意承母如  
父昆季姑姊妹無間言二孺子所遇與吾異亟勉旃以  
高而門竟吾未鬯之志乎故督課益力遷徙不常始就  
余家東花園里塾又入城就青龍巷里塾日夕與穎秀  
諸昆刺經考莠先後試高等遂定居庠之東偏如孟母  
教子意已果文聲四溢一時執弟子禮者屢滿戶外學  
而能誨非翁之愛而能勞何以至此且其材識明敏高

潔盤錯立解而織悉難緇曾大父三峯公伯祖廻川公  
大父存峯公父官宇公奕世聯忘分交初太室伯父成  
進士授潛山令延之偕往翁以忠愛之說規賢聲大著  
有以餽遺通邸客言事者力謝去瑩然白璧關西寧得  
專美于東京也是後兩伯屢戰棘闈士林屈指大物志  
固不在温飽乎然目擊翁之雅淡亦沉酣儒家風味纍  
之者久稍稍斥買田宅爲歲時伏臘資不敢以世故恩  
迺公得以逍遙物外掌中筆下白墮青蓮每挾一奚奴  
訪香山之叟選虎丘之石追習池之歡故老望之以形  
神不減昔何渠難老神仙中人也辛卯葵愚伯中式鄉

榜捷音且至笑謂太孺人曰天乎數十年骯髒之氣可  
少伸乎一生莫重之擔負自此而可弛乎猶有未了者  
惟是闔族合祭之大典耳越歲爲義舉創祭田制祭器  
修飾墓道廬宇萃羣昭羣穆之精神以奏假神靈豈非  
胥里箕裘中興之家督乎哉自此寔出其藏以廣施其  
德三黨中有困于結褵者囁于久窶者炊烟不起而左  
券無償者一涉見聞則周之使濟甚有醉臥之戚亡輸  
官之金覓自盡之路翁亦隕涕如數以十金納渠袖中  
戒勿言卽魯朱家無以踰此德益邵年益高督學使者  
採輿論升之澤宮與賢士大夫講賓主之儀爲都人標



榜穆穆几筵廩廩德讓所稱不爵而榮非耶夫軌世達  
尊髣髴歸周大老亦綦盛已而伯之心猶以爲寵命未  
霑歉然不敢自寧方謀通籍仕版以徼國恩豈意翁竟  
示疾弗克少須臾待也屬纊時惟以報國育子二語爲  
我葵愚公囑曰吾生平喜爲奇男子大丈夫而今已  
矣積善餘慶四字受用不盡付之後人遂怡然以逝時  
蓋八十有七年喬齡殊遇涕之無從兩伯顧哀哀罔極  
者終是褒封一段大事未伸耳服闋謁選得耒陽尹邑  
僻在湘之南賦逋什之七而民更貧地無他產徵稅之  
檄狎至公朝夕憂勞得耗蠹之原而爲民請命條數十

上五年政成當道交署其賢而恩綸下逮矣贈翁與賀  
太孺人袁孺人皆如其秩焚黃已遂立伯兄次子爲嗣  
以承易簣之囑循例上計陞絳州守之絳未朞而絳大  
治撫臺嘉其卓異列名特薦疏中方有不次之擢公思  
馳封已被權厝未安決意爲致政計忽聞袁孺人之變  
而志益冷矣三上乞休始得報可抵家首以吉壤爲意  
逾年定卜更葬不越數步而旺氣相迎山明水秀意者  
青鳥脉法耶墓傍一片石必借重先生大人如椽之筆  
蹴踏和淚冥思先墓一狀仰塵記室俯賜誌銘以耀泉  
壤而傳則父命而泰僭爲之也謹拜首稽首颺言日洋

洋美德乎上光靈祐下暎方來翳惟天授實然豈人力也哉歷數箕之疇五華之祝三天之祥百總由一德以結其祉而迎其釐封翁之德苞蘊醇固而措爲德業吐爲德音均足以歛諸福而垂不朽中有天獨鑒之者維元維默予小子何以知之傳不幾贅乎曰非也秦固宗子而忝列侍從鄉評朝議竊與聞之頌翁之不朽者層累而上自博士邑大夫文學憲使以及秘館鉅儒至于玉音之下賚碧簡相攜昭揭隱微表章淑媿天不言而人代言之天人原無兩心則天若傳其神人爲傳其信此傳之傳于百千億載也夫何疑胥里有靈其益增而



重乎獨余顏厚于太史公之列傳耳若夫生歿歲時曾  
裔姍戚等有誌銘在

賜進士第文林郎福建道監察御史奉  
敕巡按雲南兼理鹽法姪孫泰禎謹撰



奉議大夫雷陽叅軍泰室公傳

大夫諱學顏字棨峰泰室其號也上世居新安與考亭先生同祖元元貞間遷祖勉軒公宦簿武原因家焉入傳至北岩公爲大夫曾大父北岩公生三峰公代有隱德采列邑乘三峰公生迴川公爲大夫顯考而祖昌之大父也迴川公食餼邑庠偕伯兄豐泉仲弟存峰嶽嶽巒序爲諸生異等諸鄉達成以大魁屬之八上秋闈數奇弗售大夫生而韶穎瞻矚異凡兒三峰公恒屬意曰大吾門者必是子也迨就外傳從里中南白聞先生遊日誦萬言先生工詩博學試以偶語荅如響語輒警絕



蓋十齡而淹通經義斐然成文矣年十二諸父欲摘詞  
爲人壽架有素卷大夫戲泚筆作圖因次第爲前後序  
所擬詩若詞依稀備焉迺倣諸家法書淋漓滿卷諸父  
見之驚喜雋聲喧里中壽者之子孫至今珍爲故事越  
明年欲就童子試迴川公以大夫學尙淺難之亟請乃  
可時邑侯長松魏公正試已竣及一見卽賞異曰孺子  
一日千里何難邑諸生爲上之郡郡上之督學方山薛  
公遂補弟子員嗣是試輒高等郡邑大夫靡不交口才  
之爭爲延致邑中耆宿龍涇湯公澄吾顧公牙臺鍾公  
咸加獎詡嘉靖辛酉登賢書春秋二十有五偕計日三

峰公以大夫年少遠涉命迴川公挈之行渡楊子江怪風敗檝迴川公得心疾扶攜至京甫就二場試而父病思歸甚切遽星夜奉父南還望見桑梓父疾灑然如脫是時本房已薦擬魁竟不得三場卷不勝惋惜而大夫喜父疾遄瘳雖不得第無悶也旣歸益下帷探討墳索詩壇文社羣推執牛耳乙丑釋褐都門同籍四百與勾吳袁魯望先生尤相得驩甚倡和無虛日蓋大夫才素橫軼袁獨裁之以法大夫亦虛懷廟切名實愈暢館閣諸大老咸擊節稱江南有朱生也者居無何謁選得潛陽令潛故南畿所由走淮陽及江右孔道供億繁劇士



瘠而民纖里中豪暴恣睢箝制長吏怙強逋賦而嫁其禍於孱弱大夫至首湔剔驛傳宿弊而置豪暴於理民力稍甦次第條上邑中利弊十二事中丞栗菴宋公稱大夫經濟才列名薦剡他如剗削煩苛專以安養休息爲務無情之訟立決片言久之日晡放衙庭可羅雀時散髮箕踞茂樹中自署棠陰吏隱昔人所稱臥治非耶一切爲政不屑屑簿書而雅善化導民有兄弟鬩牆者貸弗治第令演孝友傳奇其人觀劇至一門爭死翻然悟曰侯謂我矣遂相泣友愛如初民俗蒸蒸益知以敦倫爲重蓋大夫所涵濡於家教者素也其最軫念尤在



崇文勸學視邑博諸君若家塾師禮意有加視邑諸生  
藹然子若弟其雋異者日引置堂皇譚說經術品藻甲  
乙或貧不能娶爲減俸助嘉禮以是士益勉於學潛陽  
文運日開議者以爲不減文翁化蜀所賞拔多雋才後  
先通籍於朝者累累焉治潛四載士庶怙恃若父母然  
以賦性跼蹐不能脂韋事上官課中下銓曹惜才量移  
雷陽叅軍命下之日單車就道橐中惟殘編敝衣而已  
邑之人臥轍攀轅至不得發歸而拜庭幃時大父三峰  
公年登耄耄神尙王迴川公亦留連棋酒爲洛社長堂  
開重慶彩袖稱觴天倫之樂怡如也獨母密善病疴甚

大夫依回膝下惻然曰昔王陽不忍以先人六尺數度  
九折峻坂獨奈何舍待盡之親而爲交廣萬里行耶遂  
堅意抽簪當是時繡衣溫公蕭公爲同榜中人殷勤勸  
駕貽贈繻驗得乘傳入都而大夫委曲謝去高臥弗應  
也爰卜築邑西南隅構一椽以居視膳之餘灌蔬藝木  
日委蛇林樾中騷人韻士座上常滿一味一觴陶然竟  
日置家人生產勿問優游林下者二十餘年三峰公旣  
獲享大耋迴川公亦壽至八十有三而卒時大夫年已  
週甲衰麻哭泣若孺子慕者不已又五年而大夫卒壽  
六十有五嗟乎大夫負穎銳之姿學富五車早歲而掇

巍科方壯而登仕版經綸匡濟已展驥足乃以養志承  
歡追隨杖履超然於寵辱之外不以人爵棄天爵其視  
繾綣世網者何如也昔人稱鄉先生歿而可祭於社者  
非大夫其孰當之姪祖昌頓首謹述



六  
氏  
分  
言

卷  
之  
三

四

明經朱思梅先生三世孝行傳畧

載誌

明經朱先生諱正誼字仁仲號思梅宋太師徽國文公  
再從裔孫元進士鹽官主政勉軒公十二世孫也先生  
幼穎敏十歲通五經爲邑諸生克鄉貢需次學博性至  
孝嗣世父梅泉公後婉容承志無間晨昏嗣母病籲天  
請代及遭兩大故擗踊嘔血哀毀骨立孝思追遠捐贍  
產於曾祖墓以供祀事又倡捐始祖及高祖祭田春露  
秋霜子姓獻爵薦俎羅拜於松楸下成禮始退先生承  
先啟後之孝可爲子孫世守勿替者類是教弟子先行  
後文出其門者皆一時之選劉甥滋得其傳成名進士

亦以孝聞嘗與執友論學於雲巖月渚間每遇忠孝事  
歡噓忘返蓋外和內莊未嘗臧否人物所謂不夸不惠  
可否之間者也當時士論交孚督學使者聞之有孝友

純懿名教綱維賜額郡邑重其名三聘鄉飲大賓

兩褒  
賜匾

子泰復字元生號節菴郡學生也幼承庭訓善養親志  
經濟經術悉有家法遇事敢言不爲硜硜小謹歲丁卯  
值海塘圯決以思梅先生所輯歷代塘誌上之當事依  
議舉行東南半壁賴以奠安民運白糧例點富戶克解  
半因之破家思梅先生曾倡官收官解法未舉而終先  
生白諸巡按御史疏聞於朝永著爲令并徧下於江南



諸省至今人頌其功可謂克成先志矣思陵末先生齒  
及國事輒髮豎歎曰吾世受國恩爲書生不能操刀以  
平寇亂雖生亦覩顏耳甲申懷宗哀詔至先生慟哭捐  
軀竟白刎死其執親之喪也一本思梅先生喪過乎哀  
之意水漿不入口者七日幾至滅性學博柴駱二公與  
邑侯朱公申報行省給額旌閭世稱爲孝節先生

孫廷采字子鮑號誠齋孝根天性髫齡父疾飲泣露禱  
年十五節菴先生殉難慟哭幾絕負土成墳墓廬三年  
以故淡於功名年逾壯遊庠奉母天人日進甘旨家雖  
貧供具則豐母老善病偕德配何孺人旦夕虔禱願減

子婦算以益母年病遂痊壽屆大耄而終終之日誓身  
殉族屬諄切勸止其哀毀之過猶先志也既葬復廬墓  
三年致仙草靈鵲諸瑞時士大夫作爲詩歌以紀其事  
又刻苦累貲重建高祖祠詩稱孝子不匱永錫爾類先  
生有焉始艱於嗣晚舉丈夫子天眷咸謂孝感所致無  
忝祖考不虛也康熙己丑冬杖朝屆誕諸縉紳製錦祝  
嘏迄癸巳春秋八十四齡恭遇

萬壽覃恩給予將仕郎冠帶閱二載而卒

論曰自思梅先生起家孝行父子媲美祖孫一德足爲  
人倫師表故爲之合傳云年家眷晚生錢德震拜謨


文學誠孝先生循默朱公傳

誠孝先生諱茂明字循默徽國紫陽從裔舞象卽稱孝友冠軍諸生爲文恥餽釘弋取科甲力遵先民矩矱尤嗜王文成心鉢終日枯坐研討學勿阿世艱一第或爲先生扼腕則掀髯笑曰讀書貴窮理盡性自慊身心吳康齋陳真晟曷嘗以功名顯哉家貧薄貲讓諸昆弟不給分廩餼館穀以佐事二親甚謹每伺其意迎之父病風浹歲躬抱走吳越求異人瘳之母疽背灑淚告天舌舐得亡恙庚爲之引年聲聞學憲旌以孝友格天名高月旦時開絳帳四方負笈者屢恆滿先生訓以士先德



行後文學陸象山之主靜薛文清之實踐尙勗諸先生  
好行善而力勿克死喪急難每洗其修脯周之生徒孤  
寡者養教之始卒無倦其教生徒子姓一如己子嘗枵  
腹怡然哦誦病且亟猶憑几爲其猶子講貫不輟少與  
死萊大司馬徐公從治同鉛槧互勉忠孝比大司空杜  
公士全令鹽標舉十雋後先成名進士名孝廉而先生  
獨窮死死之日無長物祇以不獲終養爲恨治命無受  
賻賵累我生平聞黃遵遺言含殮世哀之不啻黔婁子  
學者私謚誠孝先生載邑乘以傳所著有四書心解尙  
書微修身要言存心錄等書崇禎戊寅督學使者劉檄

送主入祠崇祀





朱學顏先生小傳

先生姓朱名以發字省如世居海鹽之尚胥里家業儒敦孝友爲人恂恂如愚故自號學顏弱冠能文名噪黨塾間與其族子東江先生爲文字知己故其序君文稿謂生平得力於叔之講貫者居多迨歲辛酉壬戌東江聯捷入史館君漠然無所向遂與族叔笠亭族弟雲峰族子標謝互相鏃礪故其文日新月盛歲甲子余自秦中歸標謝拉余暨里中工文者十餘輩爲文字會一時歲科試列前茅者總不越此十餘人王後盧前君每參焉於是金壇于公按試吾郡有鹽官七子之目今世所

稱曾經集乃十餘年會課之作也然其中沉浸穠郁出入於國初諸大家而掇其精華者尤推吾學顏但諸人相繼入成均領鄉薦捷南宮以去而學顏獨以明經老筮序序其文謂嗇於遇而豐於文不信然歟顧遇在一時文爭千古學顏之遇雖蹇學顏之文必傳無疑也學顏有哲嗣能繼家學長文輝補博士弟子員爲伯兄後先卒次佩蘭太學生學顏年七十有一不及選而卒有四書補講集秀軒文稿行於世同學弟殷本誠拜譔

御史白岳朱公傳

御史朱公泰禎字道子海鹽人也生穎異於學無所不  
闕中萬歷丙辰進士授福建龍巖知縣山僻歲飢多盜  
公鈞得其魁僇之餘無所問一邑懾服淫雨山水暴崩  
公稽首水涯父老掖卻之不數武已淪陷時城堞盡圯  
漂壞廬舍亡算公拮据求貸益發官粟募難民卽以充  
畚鍤之役百雉復完民不流徙治最徙漳浦浦劇邑也  
不數月已簡靜同龍巖有兄弟訟於庭者公委曲諭之  
泣數行下兄弟悔悟感泣去巨室有婦艷亡賴兒聞而  
慕之牙媪飾美媚給取其金亡賴兒恒自詡也口語益



騰婦不能自雪公廉得之縛牙媪并娼至亡賴兒搏顙  
拊膺咸引伏以故婦得白公譽望日起舉卓異第一召  
拜福建道御史條奏時務洞中機宜旣需次巡方雲南  
遠在絕域同列多引避公曰人臣之誼東西南北惟上  
所使惡乎避拜命按滇南熹廟初元有事於南郊蕭然  
繁費公抗章請以節儉紓國用上御經筵閣臣引公疏  
上改容曰御史乃愛朕耶陛辭上廷勞之曰若御史能  
愛朕雲南萬里良勞苦宜早還遂行黔寇斷滇道公駐  
節成都發蜀中兵開道建昌踰大小丞相嶺絕金沙江  
擒賊首烏利長驅入雲南申約束厲將士戰守畢備三

月水西東川鳥撒三大寇傾巢數十萬犯霑益守兵僅  
六千人公董率道將破走之斬首數千級五月水蘭烏  
復大舉犯炎方無城郭樹木爲柵公監諸將設伏以俟  
賊九十八營並進殊死鬪諸軍驅象陣橫擊之驚潰賊  
大奔遂擒童戈資俘斬之築四石城於炎方曰懷德畏  
威招攜來遠樹京觀而爲之銘曰於爍王師兮交水之  
津戎車旣好兮象陣縱橫汗草膏原兮白骨未殷鯨鯢  
京觀兮掩骼懷仁天子憫茲兮洗我甲兵受降三築兮  
貞石斯銘千秋萬禩兮鞏我帝京滇之將吏說公曰璫  
人秉國數年矣邊圉大吏無不肖祠尸媚之公列上霑



炎戰守功必以帷幄勲歸厥臣庶無遁公曰吾爲執法吏焉能媚刑餘以欺主乎核實以奏一無所頌媚人爲公危之會璫賢亦敗乃免滇越在南服夷羅苗緬之雜處黔國公握強兵世鎮撫之滇夷不知天子惟黔國是聽黔公昌祚旣耄左右蔽奸利奪民土田莊地踰賜額民嗷嗷思逞昌祚薨嫡孫啟元少桀驁不馴屏棄田間旣得立益雄蹇不甚奉法公念遐方安危惟黔國是繫安黔國所以綏諸戎也乃獎掖啟元每事左右之俾無蹈藩禁啟元亦知雅重公公言無不聽遂以戰守定滇黔諸夷咸戢公在滇南不龜璫督吏事綜其大綱而已



按部既畢日引監司登臨名山酌酒賦詩卽庶人在官者人人得其歡心增建學宮捐俸請爲旣廩羅徇雜部多有遣子弟入學者事竣還朝道聞父喪奔歸里代公者爲余公城盡反公政持繩墨與黔公啟元不相能互相訐奏元將舉兵戕命吏陰爲部署黔國太夫人有智畧屢戒之不悛懼啟元之覆滅沐氏也遂酖殺啟元以病奏事得已滇人咸思公寬大綏安茲土也服闋趨朝聞都城戒嚴衝烽火入都捍守廣寧門解嚴補南京畿道御史以族人謁選事相牽引謫徽州府知事稍遷南京兵部車駕司主事勾稽侵牟宿弊一洗以勞小劇冠

憤洋洋如平常俄正襟危坐而卒公神姿蕭散飲酒可  
數斗詩文翰墨兼有衆妙天性孝友居喪哀瘠過禮築  
園豐山東鑿沼種魚買松栽石日與故人觴詠其間有  
終焉之志其被謫也勤事不倦無遷客牢落意不竟而  
用人多惜之

論曰昔定遠之告任尙曰蠻夷懷鳥獸之心難養易敗  
且水清無大魚尙不用其言西域以叛余觀朱公在南  
荒登蒼山臨洱海蓋不廢飲酒賦詩而強藩草心巨寇  
摧滅若飛灰振槁焉何其偉歟然朱公雖遊於詩酒而  
立朝諤諤不少曲折所至輒治余公奉文法斤斤繩尺

幾亂滇域固知朱公爲深遠矣姻家年表弟彭期生頓  
首拜撰






迦陵朱君傳

學博迦陵朱君諱宗文以孝廉中會副榜選授餘杭學諭贈君榮祿大夫復初先生之季子也稟姿不凡甫成童卽能以桃柳枝畫地作字有所得輒跳躍自喜讀書過目成誦數行俱下及操觚迅掃千言若風發泉湧不可端倪以拘守繩墨爲苦出語多奇雋自成一家往往邁越其前輩性倜儻有才幹敢于任事當強禦不畏其未舉孝廉也初以誣陷於獄手不釋卷誦讀晝夜弗輟監司奇之扣所學稔知其異會時當省試察其所由蒙垢狀無關重典俾得脫入闈主司得其卷大加獎賞榜

發衆猶以爲獄中人得毋姓名類是一時藉藉然而非其罪亦藉是以釋羣疑焉君精于字學尤善草書嘗取諸家之異同考核之或一字而備數體其書作于某某變於某某或準乎法或舍法而適合乎法篤志臨摹垂二十年輯成散帙約百葉匣之值申酉之際浙中士大夫家縹緲皆爲帷囊或馭尋至此獨駭然大怪見有蛟龍護其上莫敢覷視蓋不啻造物者爲之守而鎮此寶也古人謂頡造書而鬼夜哭不信有諸其後白太守倚若涖秀州素重君才有厚契焉愛其書爲刊諸帖及半太守陞任去中丞蕭君聞而悅之更爲之終其半俾



若龍劍之合而草聖彙辯之書遂得傳于世云夫君以  
魁奇磊落之才而所交皆特達之知不可謂非奇遇矣  
然吾猶惜其僅以學博終也當軍興之後學校中久不  
聞絃誦聲君至而宮牆輪奐士類甄陶爲國家儲棟樑  
之選不一而足至今餘杭人猶稱述不置者謂朱君之  
樹人有大力焉母乃全豹之一斑也與年家眷弟查培  
繼頓首拜撰



學博子于公傳

子于朱公名景肅別號竹聲先世江南婺源人也元元  
貞間有名順者以明經爲嘉興路主簿遷於鹽之尙胥  
里遂爲胥川朱氏十一傳至清浦縣儒學教諭名篚是  
爲公會祖考篚生正學封監察御史封公生三子長曰  
泰禎次曰豫禎次曰豐禎泰禎登萬歷乙卯賢書丙辰  
成進士歷官巡按雲南監察御史平諸洞苗棘有勞闕  
于滇配鄭氏封孺人再索而得公公之生也在乙卯八  
月十有八日爲望海潮辰數日卽聞侍御公省試捷音  
父母視其福相與他兒異鍾愛之特甚年十六補博士



弟子員尋以諸生高第貢入南雍所交多名下士厥後  
遊宦者紛集金陵人人思推轂公而公知天下大勢不  
可爲恬於進取欲放浪形骸寄託於山巔水涯以娛終  
身至江南平弓旌旁招乃始就常山學博之職未幾拂  
衣賦歸田不復羈縲世網而得遂其泉石之樂矣宅傍  
築小圃栽梅薙竹月榭風臺佈置煙霞丘壑於數畝間  
顏曰喻園四方騷人逸士以及緇衣羽流之輩常往來  
園中揮麈清談琴樽圖畫殆無虛日也花晨月夕必招  
四三知己豪飲畱連快然不知老之將至仲長統樂志  
論惟公實允蹈之豈徒托諸空言未之逮也而有其志

耶間作草書寫山水煙樹雲石有倪迂董元宰筆意見者皆珍藏焉天性孝友而樂善好施與汲汲如不及爲人解紛排難勞而不伐生平睦婣任卹之行甚多而未嘗有德色邑之賢令尹至必折節願交於公民間疾苦風俗政治之利弊往往咨訪而後行陰有惠於桑梓而人莫之或覺也嘗誦馬伏波言曰凡殖貨財產貴其能施賑也否則守錢奴耳故居恒不問家人生產婚嫁畢卽析箸於諸子以其餘資賑窮局乏而又能徜徉山水以自適豫禎早世公爲之後盡生養死葬之孝豐禎生二子長兆世無嗣家業中落次子卓所出惟一男公以



幼子躍龍承祧而析產維均此亦人情所難能者晚年  
又築室於飲馬山之椒爲燒丹採藥之所喜與羽客談  
全真天倪之妙而終不惑於其術每歲春之日秋之夜  
籃輿往來山中黃冠野服翛然世外想見之者以爲飄  
飄有神仙氣云夫少年稱佳公子壯歲淡於仕宦子孫  
衆多皆能守其業壽至古稀而獲歿於地公固善於尋  
樂而不可謂福之非自天祐矣故鳴珂闕閱不足爲公  
榮翰墨聲華不足爲公美惟七十年中無少憂虞險阻  
之一日而克享清閒之福以寄傲於煙霞泉石間此公  
之得於天者獨厚而人所欣羨以爲不可及也余同祖



姊氏作配於公賢而善治生數十年兄事肩隨相知最深自丙辰以後匏繫一官久矣爲山中逋客每念喻園舊遊不置迨丁丑假歸而公已作土中人十餘年諸甥存者皆垂白爲老成人矣長君毓甦仲氏攀龍特乞一言以爲公作傳余也自今以往庶幾脫塵鞅而樂餘生悼親戚之云亡過半追維疇昔能不慨然也哉內弟彭孫遙頓首拜撰



岳陽令毅齋朱公傳

公諱亮采字杓雯號毅齋

贈榮祿大夫毅侯公季子

也生有異質十歲通五經及莊騷左史書爲文言班如法森如年十九補縣學生員順治丁酉魁詩經初公祖妣徐太夫人通經史治家以肅諸子姓朔望進見諄諄以讀書訓于公季父迦陵公暨公屬望尤殷旣迦陵公登順治戊子榜作草書彙辨海內宗仰至是公又舉於鄉人皆嘆太夫人善人倫鑒太夫人者明應天府尹學周徐公女 贈榮祿大夫明內閣中書復初公配也公自受經及操觚無他師一受毅侯公教爲學務刮去浮



華期發之議論措之事業伯仲皆早世公撫遺孤如已  
出後都督在三以舉人從戎爲 國家樹奇勲叨榮

錫命三世當駒齒未落時公早爲護此龍文也歲甲寅  
謁選得慈谿縣學諭時閩逆擾浙越中戒嚴公之官甫  
一月慈谿令以督修戰艦事羈定海上官委公攝邑事  
猝遇賊公籌策晝夜堅守至觀海衛城殘破而慈谿晏  
然以是知公非書生也教諸生色溫以莊愛護備至學  
子馬君文成鄭君清家貧力學以誣受學使者黜公白  
其寃初櫻學使者怒辨折愈力誣得雪牒至二生驚喜  
不知所由公亦不欲使之知也歲癸亥擢知山西岳陽

縣事縣地故廣蘇邨衛寨諸鄉去治二百里而遙明之  
季三受水害居民多逃亡四方盜依爲窟公念以兵治  
滋擾行保甲法家十爲伍立一人爲牌長攝之鄉總每  
鄉三十人爲鄉兵俾各衛家室不終歲獲盜魁數人餘  
黨解散邑以安逃亡者稍稍集公給以曠地田治不起  
科來益衆五年戶口加一倍晉省徵收凡耗羨陽曲居  
十七其餘十三平減粗細堅澁或上下吏緣爲奸又私  
立集首行頭諸色當役者往往破家每歲例獻羊狐皮  
諸土產于令長公至葦諸餽獻且勒石署之門告後令  
此邑者于徵收設布政使司所頒法馬出入準之吏惕




息不敢犯西安駐防兵調赴荊州易禁旅守之師所過  
驛支給至數千民驚懼無所措定制靈石仁義驛撥岳  
邑協馬十一匹差馬五役夫五馬價糗糧芻秣仰官給  
後裁省派償各里戶故至是驚懼也公言于上官復定  
制師至發倉府躬詣驛犒之洪洞范彪西先生山右儒  
宗公資其畫諾倡義學勸諸生立義田助貧士膏火資  
簿書之暇進諸生講經義質問若師友葢曩昔所受穀  
侯公教刮去浮華期發之議論措之事業者不獨試于  
秉鐸時也其他息爭除弊撫字教育之法類若此歲丁  
卯公年六十有五自念心力憊乞歸田里三請獲允檄



下攀轅者數萬人公爲留數日邑十五鄉以次祖焉家  
居六年年七十有一卒于家子鑛候選州同知鑰府學  
生長于易精究天人理數鋌太學生倜儻有幹才爲時  
所推重云

表弟彭孫通拜撰



朱處士傳

處士朱鳴玉字振侯晦翁先生從系也其父朝陽公業鉛槧篤志揣摩時推朱氏白晷娶韓氏有陶孟之風能兼理內外務俾朝陽得以專攻經史庶幾克紹箕裘不意朝陽螢牕過薦積勞成疾時韓氏年僅二十有七長子申侯甫數齡而氏懷娠方八月不憚艱辛所以調護夫子者無不至旣朝陽公捐館朱母哀痛悲悼欲以身殉親族慰喻勸阻于是母亦翻然悟曰我若捐生並逝則現在長子誰爲教育且腹中孳息未卜與其激烈而甘死節吾寧忍苦以延後嗣耳遂勉順輿情嚙臂自誓



越月而誕生次子是爲鳴玉鳴玉自幼岐嶷與閭巷諸兒戲卽如鶴立雞羣卓然獨異人早器重之稍長詢知父之歿亡深以不得見父爲恨遂終身不茹葷又念母氏栢舟矢志實以母道而兼父道深恩罔極百計承歡迨乎自立鳴玉以硯田未稔不足供食指因投筆而持牙籌謀什一之利其權子母徵貴賤頗善其經營由是家漸裕然鳴玉雖與市人遊輕財仗義有俠士風常以兄申之力有不逮能默體其意凡治佳城進羞贍皆獨爲治理不復分任其兄焉以是知鳴玉之孝友固其天性然也豈若好名之士矯飾以欺鄉黨者哉往年朱母

壽臻古稀閭邑士民上其懿徽于當事上臺靡不嗟歎  
擊節稱賢文衡李公檄郡邑給額旌表門閭當是時鳴  
玉見母潛德克彰悲喜交集而族黨里巷無論知與不  
知交相傳頌者不置也未幾淑人抱恙鳴玉奉侍湯藥  
憂心鬱鬱祝天所以身代至日久未痊扁盧束手鳴玉  
計無所出因割股和羹以進至誠感神母遂獲康健如  
初邑人嘖嘖稱奇緣是令聞沸騰採入郡史洵有徵也  
蓋非其母之賢不足以成其子之行非其子之孝亦不  
足以報其母之德也節義出于一門洵不愧晦翁家訓  
光前耀後宜其口碑之載道也鳴玉誠不朽矣然則余

又何事濡毫以來續貂之誚耶不知誌載七邑之貞孝  
未免事繁文略余叙一人之顛末庶幾情備旨詳亦以  
俾世之人知閔閔之裔藐茲孤寡仍有能砥行立節克  
紹家聲如此者又以俾世之人知讀書之子晦跡市廛  
仍有能飭紀敦倫無忝名教如此者千載而下聞風興  
起則凡後之爲孝子爲節婦者鳴玉與其母實倡率之  
矣是以不審其詞之拙而爲之傳

撰者姓氏失



左都督在三朱公傳

公諱銓達字在三海鹽人其先自婺源遷鹽世居尚胥里邑稱尚胥朱氏曾祖學古萬歷辛丑考授內閣中書祖載黃縣學生舉鄉飲大賓所著述多可傳行誼詳郡邑誌父亮勸縣學生皆以公貴 贈榮祿大夫妣 封

夫人公生順治二年時公父已先數月卒會邑有盜變邑之人避兵豐山公母鍾夫人亦買舟往途中聞空際有人呼而止之者三夫人悟返棹入胥里舊居已聞豐山被兵禍夫人泣曰某孀婦義不當荷神佑顧公臥牀褥指之曰此兒長或不凡因長齋奉佛而以公囑公季

父季父者知岳陽縣爭亮采也公幼魁梧有神力與里中兒爲泗水布陣戲里中兒皆憚公守公命惟謹初公季父切責之後見其長幼前後部署皆有法心竊喜朱故仕族公性不耐帖括入家塾日臨歐陽率更書法人詢之曰我愛其奇勁耳中康熙己酉浙江鄉榜公季父爲辦行裝擇日遣行上公車公知之故不見致期見曰大丈夫爲國家樹奇功取金印不則跌宕自得焉能跼躅需次垂老博一官乎攫其囊中金竟去公性不耐帖括至是舉于鄉以言復季父益縱酒任俠與四方豪俊自縉紳將弁下至馬醫人厮僧道者流高歌泥飲談山



川關隘歷代興亡勝敗之機不知者或以告公季父公季父笑領之而已康熙十三年逆藩靖南王耿精忠與吳三桂同謀舉兵犯順閩省旣陷氣吞東吳

朝議康親王督滿漢官兵勦賊公聞之曰此樹奇功時也會公季父任慈谿縣學教諭公慷慨渡江入署趣備鞍馬授左鎮總兵官劉顯芳標自効委任中營千總官康熙十五年隨征處州圍縉雲縉雲城小而固大兵圍數匝城不下公言于帥曰賊非致死度圍密不得出耳計賊謀至出師援兵將至腹背受敵不利乘其惶擾開一面圍賊必逸尾擊之茂不濟矣帥從之賊夜遁復縉雲



克黃鳥嶺抵大溪灘。灘流湍賊列營灘上大兵不能渡。  
議造浮橋公幼善泅命部下卒絢索數十丈夜解甲至  
灘側聽令至則使健者持索公以端縛腰間至彼岸對  
挽之卒緣以渡突入賊營賊驚潰奪賊戰艦遣卒反駕  
迎大兵期會九龍山而公乘夜與敢死士趨間道緣絕  
壁從箐篁中出九龍山背會大兵夾攻之賊退保仙霞  
關遂復常山仙霞關高險峰巒譎詭門戶重複漁梁大  
竿諸嶺界虔浙閩三省是時浙地盡恢復精忠懼益發  
精銳合諸潰賊乘巔扼要遙爲三桂犄角以綴我師大  
兵仰攻不能克晨起見關上旗幟隱隱益稠密衆愕眙

公曰賊未失利而益兵此示強日已晡有僧越關求見  
公召之則故人王生也生之言曰昨者精忠與海盜鄭  
經有小釁發符調守關兵甚匆遽更番者期明日中至  
乘虛攻之平閩如破竹詞畢竟辭去公亦不留之左右  
或咎公公曰生故人豈欺者迨夜見關中燈火燦然而  
爨烟疎淡公身先士卒直入大關守關者譟逸斫大纛  
曳以示衆繼至氣百倍呼聲震山谷獲旗幟器械輜重  
無算乘勝克復興化漳泉長泰各府縣而精忠窮蹙歸  
命經亦游魂海壖捷聞委任中軍守備十七年署漳州  
守備十九年隨師攻克陳洲馬洲等處一十九寨進復



海澄縣公之守漳也鄭賊遣衆攻漳城陷數十丈公督兵據壕力戰賊却夜令囊泥補之伏火木板下板置釘覆以沙鄭賊麾下皆跣行旦復來攻釘傷足不能行火發賊死者大半二十一年冊平閩功晉公左都督

特錫公三世封誥後兵部推公以左都督管汀洲遊擊事准

帶餘功七次劄付時人頗以職卑爲惜公曰某效微功蒙

皇恩授左都督職不卑其言蓋知大體矣方公任守備時提督藍理爲遊擊會

朝廷遣使者按視閩營藍營隸兵五百上官冊載千五百



名使者至藍以實聞上官怒誣藍解砲火失機藍念禍  
自致不欲分謗公毅然任其咎并繫營中後誣得白藍  
與公遂定患難交漳州胡一飛者力學貧不能自給公  
廉知其賢助之資更爲延譽後成進士官翰林名藉甚  
一時蓋公縱酒任俠勇共用急友難非作橫無賴慕灌  
夫郭解之爲人三十二年遷管均房叅將任事三年年  
五十有一卒于官

莆田林繼光拜撰

